

飛六甲衛道右軍將軍天兵也所以太一君為左天師君為右各舉功過之事也

金鎖流珠引卷之十六

金鎖流珠引卷之十七

言七

中 華 仙 人 李 淳 風 注

六甲陰功上之上

太上老君常敕左右軍修舉其功過

滿三十者可遷仙位過犯三十條者退仙一階敕三官故常令甲子日言奏文狀在於六甲君官將吏等多以取甲子日言功功是陰功也其陰功有六註一每日心禮天尊前聖後聖太上大道君天帝三尊三元等君言此功自在師口訣交法之時須口一一上問記取莫忘此是口言功為第一秘法夫修行人不得此法存種百無有過不知次第而行功天曹並不登錄事須一一得師口訣以傳授身心俱受畢便吞符功可上天記錄一一與子言其多少也聞奏不絕也今具列言陰功陰德陽功陽德各具有七條墨書是前聖虛皇上帝大道君授合仙之人骨命不合仙不授註前聖太上老君是也朱書是後聖玉皇上帝上道君授合真之人不合真不授註

夫為師傳法皆須細試弟子察其情性若多陽功不須與授內陰功有三前聖授三皇君及四十九真人俱得仙一則身授道後內以直心陰修救度人物疾病自身常服二等六甲計日言功前修老君六甲三年服符遺炁鎮神安心炁治五藏光明神力有濟世濟者以符試救人疾厄得差度者謂之神力通濟人之難得神之力上感道恩德合天心功故得一人一物命謂之功濟也即添服靈飛六甲符便以計修年月日修行之功謂之第一陰功也後聖君告東海青童君及諸天諸方合為註合為者是告此法之時未得為仙真之位猶是志心求修人未得成道受此法後皆十年十五年十四年八年九年得道成大真人後聖君知其識性合為真人故言合為大真人也大真人曰夫志人識性真心修求大道皆須內著陰功陽德即積此功德而為真人在陰功陽德具後法說非從宿因前業所種生命骨體合道註宿因說生合官職所種即合有少許來由若說求真情性俱失此

名身外種種福田資餘來生得受入中之因
不關身中得道之事夫求真者真人之情性
即得也即得為真人此是妄言也吾今一一
具說此法於六甲引書之內而作三等陰功
三等陽德授傳識性註識性者識道之性而

無兵常行陰德陰功不休故世人龍神鬼畏
而敬之謂之誠真也繼代為真人

第一等陰功六甲中修行出五行三界之法

註法中服符祭醮奏章步綱等法各各自有
經傳流行世世雖有本而無真者言功也

第二等陰功七星中步躡地紀天綱降九精

使九靈衣七斗消五毒度三災入真境之法

註此法各自有經文此言修行用功之料具
在金鎖流珠中有也

第三等陰功變三五七九註三是三元五是

五行七是七星天綱地紀九是九真上大道

君九祖君內說步綱之法馳役萬神之要訣

萬步之要註三是三元即行九步為步五是
五行上元三五為步法或十二步或十五步
皆變天綱地紀之步而多是受之於務猶子

之下後方變為萬步

右三等陰功皆合墨書為前聖曾授上盤古

三皇中古黃帝夏禹繼代不絕後聖方再授

東海青童小君及諸天諸方大真者即朱書
也

第一等陰功有十條

老君曰第一條陰功可以修服六甲符計日

服之從甲子日始終於癸亥日又周而復始

於甲子每至旬滿逢甲日輒有三大符註一

玉女符一是甲直日符一甲日符符三符併

吞之併吞之即每日存呼神符旬將旬玉女

六丁玉女直日某神姓名註假令甲子日即

呼玉女即從官人數符吏姓名等即誦前聖

太上老君長生呪一遍方始呪曰

令則玄髮白反黑齒落更生神仙度世心開

目明出入行來萬神見管所求皆得所願皆

成既却百鬼又辟五兵除某死籍著則玄仙

名乘雲駕龍上昇天庭急急如律令祝說便

服符日月年數數一服不休此是論一日一

功一年三百六十功亦三百六十也年年行

之不休不論年月身自堅牢如金之體百病

不入永無敗壞之期此之陰功上條第一也

此太上老君教三皇條之上上條

第二條陰功常以慈心救人濟物註人有疾

病在身被鬼祟所害以符藥符救之令人得

安是鬼得輕放使人鬼相離不為究對此為

大功於人大恩救鬼各得相去離不為惡害

名曰大功於人鬼者也解敵釋對陰行止諫

之心常以得前一人言之定訖於夜後陰與

某人解某怨對令其二人各自退悔其過不

相謀恨即須禹步存大山隔斷二魂神不相

恨念毒惡各自消散後日月稍多自能彼此

消惡如此之功微妙為上上妙極註老君曾

此陰功者本是一人知有道能制解口舌怨

對而法師頌一人之言便解諫而人不相對

恐此名无上功德


步天綱圖躡地紀圖順倒反三遍訖言曰今

有某州縣鄉里某官人百姓上言百姓某已

與某處州縣鄉里姓名與某相加謀欲以相

敵敵即相謀殺註令行陰綱與隔解之呪曰

令彼此不嗔各歡相代阻隔山海俱難吾轉
天關各指指後欲前舉心者心身自寒各須
伏心獲安犯吾此令者魂魄守天盤盤則代
罪也



右斗上十二步盤上三十四步

舊說云順倒及於網上便為之今之是順倒
反三遍今按後聖君授方諸小童君及王君
口訣云順倒兩遍單向陽星網頭起右散行
三遍訖上綱左足躡陽明星次右足躡陰精

又先前右足躡玄冥左足躡丹元次右足躡
北極左足躡天關右足次前與左足并乃通
氣祝曰

金木相剋木土相伐水火相滅銅口鐵舌前
舉者折二心各退兩舌无說二心俱伏不相
誅滅吾出陰兵制汝二人心怨休歇急急如
律令祝訖各檢左右刀支少間註刀支上卷

具註訖此更云在左手第五指第三節右邊
是故此法為人修行令怨對不相加伐并被
人謀害自身為之或彼人有心此人不對常

恐來責伐我身求請阻隔令永不來者以與
三夜為之不令人見之見之即不神驗也註

夫人行陰功陰德其陰功陰德未成便被陽
人知見便即一口發言千口動舌却為陰
過更敢更修行其陰功助入而獲被陰官所

責也若自行陰功助國護身救人者前從地
紀三遍訖順倒反三遍是也即飛天綱三遍
訖即散變三步九跡禹步擊止之如恐不止

即十二步禹步一遍又步十五步存上中下
三將軍領兵各三千萬眾及六甲諸神一一

存如舍弘圖及流珠中元下元等三將軍圖
擊之三度萬事自消亦不苦損彼人若六度
為之彼人病不可妄行損已陰功九度為之
彼立殞註不可妄行之損已陰功以成陰過

也禹步三等並以圖在上引中訖今此禹步
以存作山隔斷相敵之人陣法訣步圖



此名地軸禹步存二十四地軸神開一寸之
地而為萬里江山或萬里江山橋為一寸步
之地此禹步微妙能伏攝於人身騰空而不
知遠近也訣在左手第一指根三橫文中是

地心訣也註不得師示文理之極靈處得真
訣步綱三遍訖即以右手捻左手手中訣訖又

踏地舉足下地心訣及地里訣即呪曰
天清地平日月順行人物俱泰國得君貞今
有某人逆天喧呼巨履禹綱隔斷常為千山

萬坑不得過過者全軍身不生以取本色石

擲之便止本色石在六甲嶺中看取即得也
此步網非但作陰功救人而常行之三年立
可縮地脉往往甚速於飛空註普虛公先生
姓施名存孔夫子弟子也以師孔之業求仕
數不達乃仰天而歎曰我心猶欲求至道至
尊玉皇上帝殿下之巨萬重靈臺玉京左殿
卿相何況於世人皇帝下求一小臣如許難
得即素儒書學道專師初遇西州趙公遂法
師學讀經籍聲聲朝修禮念之道精志不休
三十七年漸覺恍惚昏困老无力又仰天而歎
曰何事天生我愚身學儒儒道成而不帶學
道心志苦而不明豈非我身无宿因福運命
不行奈何任老而死須臾之間問絕而死死
中忽見一女人甚美觀絕世告存曰汝學道
不達明師不知修行求智慧之心堅全剛之
身勞蓮花玉色之藏唯學歌音之聲誦讀開
語作小兒之學學音音句之能去道漸遠若
為得道儘可改行別學須往少室山中尋九
靈先生九靈先生是若君分身也一云是若
君弟子王夫人人生善修行陰功陰德今道

已成願以早去勿在遲遲於是施存得覺便
往少室山中尋求三月日不遇但以清淨善
心不移想於路傍逢一老人年可七八十許
皓首行步如虎力狀可負別人施存視之良
久知是神人即走趨下情而拜路人驚怪問
曰拜此老人何也眾中有一人曰真人相見
趨謁之禮也於是九靈先生責曰汝來何遲
吾欲將汝入玉屋山講六甲夫人久待汝未
天曹有符下令投汝修行六甲陰功服符治
身身今已老何不早修於是施存伏地叩頭
再拜惟稱死而再生得遇見先生伏願先生
教以不死之法得延賤下之軀不死伏為奴
僕之使使不論年月唯願收錄以乞餘生九
靈先生便將入玉屋山三年修行躡步天綱
地紀之法吞餉六甲靈飛之文及投地軸之
符錄二十四階帶轉地軸天關陰而修滿十
四年道成已將一壺可容二升之器以包羅
大羅天之下太極之中世界以入壺中或壺
為六甲營出蒸禁之術為籙投度世人以行
陰功陰德豈非心之至而感神人為師教授

或道後更遊世七百年至晉時為貴長房所
遇教長房縮地脉之法三日宿壺中受法歸
早三周年一旦太平金闕後重玉皇上帝君
使仙人玉女下迎上昇為左仙上御之位如
世太常卿相似果其太上大道不遠施存之
願見賜仙師第三條陰功學道法成陰功可
濟若道功著常觀世間有凶神毒龍妖鬼妄
行狂風暴雨傷損人物不論水陸須步躡天
網地紀各三遍具前說步天地網國散為禹
步九跡十二跡或十五跡常轉配天關舉手
指之三六九註或三度毒林自止可不損其
命六度指病九指殞死不可妄行禁殺非道
也須以察知實以害人妄作妖怪三度兩度
人物眾皆是不安乃可動法步網度其妖自
止止而即放不可便殺殺之即擒某龍神鬼
之妖精獸等乃支其妖獸等即三日內自死
後聖君告金鎖流珠掌訣眾物龍獸等用訣
刀支皆在此中用此看驗得君曰不可妄行
行者皆傷他命有罪於眾人物人物不安傷
人物命或作水旱敗傷眾命以法收斬註天

關所止指是九指是斬也以一命而救得十命謂之倍功救數滿三千白日昇天註風按晉書神靈異記曰許遜身為旌陽縣宰而學神仙禹步之道忽蜀山大蛇三條漢江毒蛟六條共蛇為祟與人前後橫江截嶺捉人為食上天知關避法成禹步躡跡配轉天關救而殺之不過九物之命而救者十萬餘人此蛇作夢於晉武帝臣今食江淮人十五萬人也晉帝大驚不逾二年遂獨獲斬遂殺封壇正朝宰相固讓不受地府書奏天曹天曹奏上帝太平金闕後聖玉皇上道君遣使下迎賜道白日昇天家口搬宅而去也此之故殺而无罪却獲陰功又或有精妖祟人累代皆結縛不斷或是陰精邪祟疾病人口宅舍不安人多疾患代代不休者此准

太上老君符命與符治病者得差轉配天關遙指之九度并救六甲中某日直官名從官人數直符吏等名急急催促如此治病符能變為神為吏斬彼妖祟而其病立差如此之功上天為上上玉帝遙喜秘之勿妄用

右六甲陰功三條餘七條在第十四卷

金鎖流珠引卷之十七

正一天師清微弟子 洪百堅 製作



金鎖流珠引卷之十八

言八

中 華 仙 人 李 沐 風 註

六甲陰功下

第四條陰功老君曰夫學道之士於世修行之功道法精能符力成就忽有百姓及官人被時行瘟毒瘴氣疾病染者死傷可以捨瘟鬼目禹步九跡三步配天關指某方某方是病人居處三度然後與符帖一一救之立差其家有十人三人四人五人見染頭重欲死者與符吞之立差未病者帶一符令共一牀坐卧悉不相染易永令病者得差不死未病者不相染易一家有十人得十功一家二十人得二十功此符法陰功之大也秘之勿妄傳非人言功十條此條要驗并後聖君授章於六甲及六甲夫人章在流珠上篇後聖君告天師道陵六甲之中十條言功治除瘟鬼救人條其功甚大卿可自身及弟子觀世人中有被者急與治之世人甚畏此疾卿能救之萬民喜歡皆言功力微妙可以聞於上天